



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25

Vogošća, 30.06.2025. godine

VIJEĆNIČKA PITANJA
POSTAVLJENA NA 8. REDOVNOJ SJEDNICI OPĆINSKOG VIJEĆA VOGOŠĆA
održanoj 26.06.2025. godine

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

- 8/1.** U čijoj nadležnosti se nalazi Bunker i zemljište oko njega, a koji se nalazi na ulazu u ulicu Stara željeznička stanica, Semizovac.
- 8/2.** U vezi sa prvim pitanjem, ko je zadužen za njegovo održavanje i održavanje zemljišta i prostora oko istog.

Vijećnica **Salčin Sabiha (u ime Kluba vijećnika SDA)** postavila je slijedeće vijećničko pitanje:

- 8/3.** Postavljam pitanje prema KJKP Tržnice-pijace d.o.o. Sarajevo da li je u planu obnova tržnice u Vogošći u skorijem periodu. Ukoliko jeste, kada se očekuje početak realizacije navedenih aktivnosti. Da li postoji usvojeni projekat, budžet ili okvirni plan za obnovu.

Obrazloženje:

Tržnica u Vogošći predstavlja važan komunalni i privredni centar za lokalno stanovništvo, te značajan izvor prihoda za mnoge male proizvođače i trgovce. S obzirom na trenutno stanje objekta, koje zahtijeva ozbiljne infrastrukturne i tehničke zahvate, smatramo da je neophodno hitno planirati i realizovati njenu obnovu. Cilj je poboljšanje uslova rada i boravka za sve korisnike, kao i unapređenje ukupne slike tržnog poslovanja u našoj općini. Nažalost, u općini Vogošća, koja broji više od 30.000 stanovnika, funkcionalna gradska tržnica praktično ne postoji. Naši sugrađani nemaju adekvatno mjesto za kupovinu domaćih proizvoda, dok mali proizvođači i prodavači svoje proizvode često nude na ulici – u neuslovnim i nereguliranim okolnostima. Takva praksa ne samo da otežava prodaju, već predstavlja i zdravstveni rizik zbog nepostojanja kontrole i sanitarnih uslova. Stoga, ovim putem apelujemo da se pitanje obnove tržnice u Vogošći uvrsti među prioritete, te da se u što skorijem roku poduzmu konkretni koraci ka izgradnji savremene, funkcionalne i higijenske sigurne tržnice.

Vijećnik **Efendić Emir (u ime Kluba vijećnika S BiH)** postavio je slijedeće vijećničko pitanje:

- 8/4.** Postavljam dopunsko pitanje prema Inspektoratu Općine Vogošća, da odgovore da li je Inspektorat u skladu sa zakonom i pozitivnim propisima iz dijapazona svoje jurisdikcije obavezan izaći na lice mjesta, radi utvrđivanja činjenica da li je javna površina vlasništvo Općine Vogošća uzurpirana nelegalnom gradnjom. Prema nadležnoj općinskoj službi na 7. redovnoj sjednici Općinskog vijeća upućeno je pitanje, da li je od nadležnih odobreno pretvaranje zelene površine u parking prostor u ul. Jošanička, koja se nalazi između dvije zgrade neposredno uz ogradu pomoćnog stadiona „Hakija Mršo“. Da li je od nadležne općinske službe izdato odobrenje za izgradnju parkinga. Da li su na lice mjesta izlazili nadležni i utvrdili ko je izvršio uništavanje zelene površine izgradnjom parkinga. Od nadležne općinske službe dobili smo odgovor kojim nas upoznaju da su za navedeno nadležni komunalni redari KJKP „Park“, dok nam nisu dali odgovor na konkretno postavljeno pitanje za izgradnju parkinga na navedenoj lokaciji. Molim nadležnu službu da nam konkretno odgovori da li su nadležni da postupe po navedenom upitu, da li su nadležni da izađu na lice mjesta i utvrde ko je izvodio građevinske radove nasipanjem i valjanjem građevinskog materijala, čime je nelegalno izgradio parking. Da li su dužni da utvrde je li navedenim postupkom nezakonito uzurpirana

javna površina koja je vlasništvo Općine Vogošća. Napominjemo da je vidljivo da je navedena površina od strane nepoznatih osoba nasuta tamponom, koji je izvođenjem građevinskih radova uvaljan na zemljanoj zelenoj površini, koja je pretvorena u parking.

Vijećnik **Gluhović Alija (u ime Kluba vijećnika Naprijed BiH)** postavio je slijedeća vijećnička pitanja:

- 8/5.** Postavljam pitanje prema nadležnim institucijama i preduzećima kakav je stvarni status noćne autobuske linije Vijećnica – Vogošća (ili Bašćaršija – Vogošća).

Obrazloženje:

U prethodnom periodu, građanima općine Vogošća bila je dostupna noćna autobuska linija na relaciji Vijećnica – Vogošća, koja je, prema tvrdnjama više korisnika, do prije nekoliko mjeseci redovno saobraćala. Građani, posebno mladi, koristili su ovu liniju za povratak iz centra Sarajeva, naročito u noćnim satima kada se održavaju razni društveni i kulturni događaji. Međutim, prema brojnim pritužbama građana, u posljednje vrijeme ova linija nije u funkciji, iako su u javnosti objavljeni planovi i redovi vožnje o noćnim linijama u Kantonu Sarajevo. S obzirom na značaj ove linije za sigurnost i mobilnost naših sugrađana, a naročito mladih, molim za hitnu reakciju.

- 8/6.** U ime građana Općine Vogošća postavljam vijećničko pitanje Općinskom načelniku i nadležnoj općinskoj službi, u kojoj fazi se nalazi projekat nadzidiivanja Upravne zgrade KSC „Jasmin Isanović – Žuti“. Pored toga zahtjevam da mi se dostave slijedeći podaci:

1. U kojoj tačno fazi se nalazi pomenuti projekat.
2. Ko je finansijer projekta, sa tačnim iznosima sredstava.
3. Koji je rok za završetak pomenutog projekta.

Obrazloženje:

Svjedoci smo da već duži niz godina ovaj projekat se spominje kao najvažniji kapitalni projekat, svjedoci smo stalnih potpisivanja ugovora i anexa ugovora o realizaciji ovog projekta dok na terenu ne vidimo nikakav pomak pa makar i tablu sa informacijama o realizaciji ovog važnog projekta za sve građane, nevladine organizacije i javne ustanove koje koriste i koje će koristiti prostorije Upravne zgrade KSC „Jasmin Isanović – Žuti“. U prilogu vam dostavljam slike sa zvanične stranice Općine Vogošća, portala RTV Vogošća na kojem su objavljene informacije o ovom projektu, potpisivanje ugovora kao i anexa ugovora, sa obećanjima i terminima realizacije.

Vijećnik **Piknjač Admir (u ime Kluba vijećnika NiP)** postavio je slijedeća vijećnička pitanja:

- 8/7.** Može li Općina Vogošća renovirati ili izraditi i postaviti nove, kvalitetnije natpise na mjestima i pločama na kojima su ispisana imena šehida i poginulih boraca iz proteklog rata '92 - '95, kako bi se na primjeren i dostojansven način obilježila i očuvala uspomena na položene živote boraca i sam doprinos u odbrani naše domovine. Napominjem i odgovorno tvrdim da je sramotno da na pojedinim mjestima ne može se pročitati ime poginulog borca, a samo mjesto i okolina oko istog sa aspekta urednosti, izgleda i čistoće je poražavajućem stanju.

- 8/8.** Kada se planira renoviranje i rekonstrukcija pješačke staze ispred objekta na adresi Igmanskabr.1 MZ Hotonj, na potezu od benziske pumpe „Ame“ do autopraonice „MM“ u Hotonju?

Obrazloženje:

Trideset i više godina poslije rata nikada nije sanirana niti održavana pomenuta pješačka staza. Trenutno se nalazi u dosta lošem stanju, a nikada nije održavana niti u zimskom, a ni ljetnom predviđenom održavanju. Treba izvršiti sanaciju iste, te ukloniti, okresati rastinje i pokositi travu uz i oko pomenute pješačke staze.

Vijećnik **Cvrk Ćamil (u ime Kluba vijećnika DF)** postavio je slijedeće vijećničko pitanje:

- 8/9.** Postavljam pitanje prema KJKP „Rad“: Stanovnici ulice Skendera Kulenovića pitaju postoji li mogućnost da se poveća broj kontejnera za smeće u ovoj ulici.

Obrazloženje:

Trenutno se u ulici od ulaza br 10. do broja 38. (desna strana ulice, stambene zgrade) nalazi samo pet kontejnera za smeće. Ovaj broj kontejnera i njihov kapacitet nisu dovoljni da prime svo smeće iz stambenih zgrada sa oko 150 stanova. Ranije je postojala niša sa još dva

kontejnera kod kuće broj 39., ali su ti kontejneri i niša uklonjeni bez bilo kakvog objašnjenja. Slijepi krak ulice u kojem se nalazila niša sa kontejnerima, a u kojem se nalaze privatne kuće djelimično je riješen podjelom kanti za smeće. Međutim, sav krupniji otpad, pogotovo trava i granje i dalje se odlažu u kontejnere. Na samom početku ulice, iznad Doma zdravlja postoje kontejneri za smeće ali su oni od prvog ulaza u zgradu (ulaz br.10) udaljeni više od 100 metara tako da to predstavlja problem kod odnošenja i odlaganja smeća, pogotovo u zimskom periodu. Doduše, iznad ulaza broja 38 (poslednji ulaz u stambene zgrade na lijevoj strani ulice) postavljeno je pet kontejnera, od kojih su dva za klasifikovani otpad. Ovi kontejneri međutim, ne rješavaju problem odlaganja smeća, pogotovo za ulaze od broja 20. do broja 30. Zbog svega navedenog stanovnici ulice Skendera Kulenovića pitaju i traže da se poveća broj i kapacitet kontejnera za smeće.

Vijećnik **Škoro Hamdija (u ime Kluba vijećnika Naprijed BiH)** postavio je slijedeće vijećničko pitanje:

8/10. Postavljam vijećničko pitanje kada će napokon biti riješena rasvjeta u ulici Spasoja Blagovčanina.

Obrazloženje:

Iako smo više puta postavljali ovo vijećničko pitanje ne možemo da to ne uradimo ponovo, jer su zaista više pređene sve crvene linije kada je u pitanju ovaj problem građana i smatramo da se odmah i hitno mora pristupiti rješavanju ovog problema.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

8/11. Postavljam sljedeće vijećničko pitanje: Da li su započete aktivnosti na izradi godišnjeg izvještaja o implementaciji Strategije razvoja Općine Vogošća za 2023. i 2024. godinu.

Obrazloženje:

U skladu sa Zakonom o razvojnom planiranju i upravljanju razvojem u Federaciji Bosne i Hercegovine, te Uredbom o izradi strateških dokumenata u FBiH, lokalne samouprave su obavezne da, uz izradu i usvajanje razvojnih strategija, osiguraju njihovu dosljednu implementaciju, praćenje, izvještavanje i evaluaciju. Jedan od ključnih alata u tom procesu su godišnji izvještaji o radu i izvještaji o razvoju, koji služe za praćenje stepena realizacije strateških ciljeva, prioriteta i mjera definisanih Strategijom razvoja općine. Strategija razvoja Općine Vogošća usvojena je 30. marta 2023. godine, a u skladu s važećim normativnim okvirom, obaveza Općine je da svake godine izrađuje:

- Godišnji izvještaj o radu, koji prati provođenje planiranih aktivnosti i ocjenjuje doprinos u ostvarivanju programskih mjera,
- Godišnji izvještaj o razvoju, koji ocjenjuje stepen implementacije Strategije razvoja, analizira razvojne trendove i napredak ka postavljenim ciljevima.

S obzirom na to da su prošle dvije kalendarske godine (2023. i 2024.) od usvajanja Strategije razvoja, molim da mi se dostavi detaljna informacija o sljedećem:

- Da li su započete aktivnosti na izradi godišnjeg izvještaja o implementaciji Strategije razvoja Općine Vogošća za 2023. i 2024. godinu?
- U kojoj mjeri je implementacija Strategije razvoja do sada praćena, te da li postoje izazovi ili prepreke u prikupljanju podataka i korištenju indikatora predviđenih strateškim dokumentom?
- Koja je predviđena dinamika izrade, rokovi i plan prezentacije ovih izvještaja pred Općinskim vijećem?
- Da li će izvještaji sadržavati analizu učinaka u odnosu na strateške ciljeve, uključujući prijedloge korektivnih mjera gdje je to potrebno?

Cilj ovog pitanja je da Općinsko vijeće kao tijelo nadležno za usvajanje strateških dokumenata dobije pravovremenu informaciju o napretku njihove implementacije, te osigura transparentnost i odgovornost u provođenju javnih politika na lokalnom nivou.

8/12. Postavljam sljedeće vijećničko pitanje: Da li su započete aktivnosti na rješavanju imovinsko pravnih odnosa za Spomen-obilježje civilnim žrtvama Drugog svjetskog rata u naselju Krivoglavci ?

Obrazloženje:

Podsjećam da je u prethodnom sazivu Općinskog vijeća Vogošća usvojena vijećnička inicijativa kojom se zatražilo da se izvrši osvjetljavanje Spomen-obilježja civilnim žrtvama Drugog svjetskog rata u naselju Krivoglavci, kako bi isti bio jasno vidljiv s magistralnog puta i

iz pravca kružnog toka. Cilj ove inicijative bio je očuvanje historijske i memorijalne vrijednosti lokaliteta, kao i njegovo adekvatno isticanje u prostoru, posebno imajući u vidu prometnu frekvenciju lokacije i značaj koji spomenik ima za lokalnu zajednicu. Prema informacijama koje sam naknadno dobio u komunikaciji s predstavnicima boračke organizacije UABNOR koja je, kako je poznato, zadužena za održavanje i čišćenje ovog spomenika realizacija pomenute inicijative je zaustavljena zbog činjenice da nisu riješeni imovinsko-pravni odnosi na navedenoj parceli. S obzirom na vrijeme koje je proteklo od usvajanja inicijative, kao i važnost ovog spomenika u kontekstu očuvanja kolektivne memorije i kulturno-historijskog naslijeđa naše općine, molim da mi se, putem nadležne općinske službe, dostavi sljedeće:

- Da li su u proteklom periodu poduzimane aktivnosti na rješavanju imovinsko-pravnih odnosa koji se odnose na zemljište na kojem se nalazi spomenik?
- Postoji li procjena kada bi se mogli okončati imovinsko-pravni procesi i otpočeti konkretni radovi na osvijetljavanju spomenika?

Smisao ovog pitanja nije samo tehničke prirode, već ima za cilj podsjećanje na važnost njegovanja kulture sjećanja i brige o historijskim spomenicima, kao i odgovoran odnos prema ranije usvojenim zaključcima Općinskog vijeća.

Vijećnik **Mehić Almedin (u ime Kluba vijećnika SDA)** postavio je slijedeće vijećničko pitanje:

8/13. Postavljam pitanje prema nadležnim organima, a radi se o prijevozu učenika na području općine Vogošća, tačnije vanlinijski prijevoz učenika osnovnih škola. Molim Vas da nam date informaciju, da li će se i naredne školske godine organizovati vanlinijski prijevoz za učenike i u kojoj je fazi taj proces.

Vijećnica **Curić Samira (u ime Kluba vijećnika SDP)** postavio je slijedeće vijećničko pitanje:

8/14. Molim da mi nadležna služba dostavi izvještaj o izmjenama novog Regulacionog plana za naselje Rosulje. Građani izražavaju zabrinutost da plan predviđa isključivo izgradnju stambenih zgrada, bez odgovarajućeg sadržaja koji bi odgovorio na potrebe svih generacija. Zanima me:

1. Da li su u okviru izmjena plana razmatrani i uvaženi zahtjevi građana da u naselju, pored stambenih jedinica, budu planirani i sadržaji za djecu, mlade, ali i za stariju populaciju (npr. Igrališta, zelene površine, šetališta).
2. Da li će javnost biti uključena u dalji proces donošenja izmjena Regulacionog plana?

8/15. Molim vas informaciju o trenutnom statusu projekta izgradnje osnovne škole na Rosuljama. Naime, interesuje me:

1. U kojoj fazi se trenutno nalazi izgradnja škole?
2. Da li su završeni svi potrebni urbanističko-tehnički i administrativni koraci (npr. dozvole, izvođač radova, finansiranje)?
3. Kada se očekuje početak (ili nastavak) konkretnih građevinskih radova?
4. Koji su predviđeni rokovi za završetak izgradnje i početak rada škole?

S obzirom na važnost ovog projekta za lokalnu zajednicu, molim da mi se dostavi detaljna i ažurna informacija.

Vijećnik **Bogilović Enis (u ime Kluba vijećnika NiP)** postavio je slijedeća vijećnička pitanja:

8/16. Da li je moguće ponovo upaliti i postaviti u rad semafor na Kobiljoj Glavi do početka radova kružnog toka.

8/17. Kada će se adekvatno sanirati pruzni prelaz na putu M18 kod Vatrogasnog društva.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

8/18. Kada će početi izgradnja osnovne škole na Rosuljama.

Obrazloženje:

S obzirom na veliki priliv stanovnika na području Rosulja, tražim informaciju o izgradnji planirane osnovne škole na navedenoj lokaciji Rosulje, kada će početi izgradnja.

8/19. Zašto je zapušteno i neosvijetljeno košarkaško igralište u ulici Skendera Kulenovića.

Obrazloženje:

S obzirom na veliki broj djece i tinejdžera na Rosuljama i u ulici Skendera Kulenovića, pitam zašto je košarkaško igralište smješteno u navedenoj ulici zapušteno i posebno noću neosvijetljeno.

Vijećnik **Kulo Muamer (u ime Kluba vijećnika SDA)** postavio je slijedeće vijećničko pitanje:

8/20. U kojoj je fazi realizacija projekta izgranje kanalizacione mreže za ugrožene kuće u ulici Nova Cesta, MZ Semizovac (poznato kao kuće Behlulović i ostali) obzirom da na navedenoj lokaciji pored problema ne postojanja kanalizacione mreže imamo i pojavu kližišta koje je zabilježeno početkom 2025. godine.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25
Vogošća, 30.06.2025. godine

INICIJATIVE POKRENUTE
NA 8. REDOVNOJ SJEDNICI OPĆINSKOG VIJEĆA VOGOŠĆA
održanoj 26.06.2025. godine

Na 8. redovnoj sjednici Općinskog vijeća vijećnik **Omerović Denis (u ime Kluba vijećnika SDP)** pokrenuo je slijedeće inicijative:

- 8/1.** Pokrećem inicijativu nadležnim službama za postavljanje table koja signalizira ulazak u naselje Svrake.

Obrazloženje:

Na ulazu u naselje Svrake, a prije mosta koji vodi u samo naselje, trenutno se nalazi tabla koja označava ulice i sa natpisom "Ulica Svrake", što je netačno jer Svrake nisu ulica, već naselje. Ranije je na tom mjestu postojala odgovarajuća tabla koja je označavala ulaz u naselje. Molimo da se postojeća tabla ukloni i postavi nova tabla, koja označava ulaz u naselje i sa ispravnim natpisom, a kako bi se izbjegla konfuzija i očuvao identitet naselja.

- 8/2.** Pokrećem inicijativu nadležnim organima za označavanje parking mjesta za osobe sa invaliditetom u ulici Omladinska kod broj 29.

Obrazloženje:

Molimo da se u ulici Omladinska, kod broja 29, označi parking mjesto za osobe sa invaliditetom, jer na toj lokaciji živi osoba sa otežanim kretanjem, a trenutno ne postoji adekvatno obilježen parking. Uzimajući u obzir zakonske propise i obavezu lokalne zajednice da osigura pristupačnost osobama sa invaliditetom, predlažemo da se postavi horizontalna i vertikalna signalizacija i da se osigura da parking koriste samo osobe s validnim znakom pristupačnosti. Ova mjera bi značajno olakšala svakodnevni život i unaprijedila kvalitetu života.

Vijećnica **Salčin Sabiha (u ime Kluba vijećnika SDA)** pokrenula je slijedeću inicijativu:

- 8/3.** Pokrećem inicijativu prema nadležnoj Općinskoj službi, za postavljanje rampe za invalidska kolica u ulici Spasoja Blagovčanina br.20.

Obrazloženje:

Na osnovu zahtjeva samohrane majke Jusić Hasije, pokrećem ovu inicijativu, za postavljanje rampe za invalidska kolica za njenog malodobnog sina Hodžić Zejda, koji je od rođenja u invalidskim kolicima. Iako je urađen pristupni put za ovaj ulaz, tj. u ulici Spasoje Blagovčanina br.20., u istom imaju stepenice, a majka nije više u stanju da ga nosi preko tih stepenica, jer dječak raste i razvija se. Molim nadležnu službu i Općinskog načelnika da što prije izađe u susret ovom zahtjevu, te postave rampu, kako bih olakšali život samohranoj majci i našem sugrađaninu Zejdu, te mu omogućili da može samostalno da izađe ispred zgrade u kojoj živi.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

- 8/4.** Pokrećem inicijativu za iznalaženje lokacije za izgradnju centralnog zabavnog parka za djecu i mlade na području općine Vogošća.

Obrazloženje:

Općina Vogošća ima značajan porast broja stanovnika na svom području u zadnjim godinama, koji je sa tendencijom rasta. Samim tim povećan je i broj djece, a navedeno nam pokazuju podaci o nedostatnim kapacitetima u obdaništima, osnovnim i srednjim školama. Obzirom da

na području općine Vogošća nema centralni zabavni park za djecu i mlade sa savremenim sadržajem, višespratnim toboganima, drugim mobilijarom namjenjenim za igru i zabavu djece, potrebno je iznaći lokaciju na kojoj bi se izgradio savremeni centralni zabavni park za djecu i mlade. Zbog nedostatka savremenog centralnog zabavnog parka, roditelji djece sa područja općine Vogošća, prinuđeni su svoju djecu voditi u zabavni park „Safet Zajko“. Navedeni zabavni park posjeduje savremene višespratne tobogane i savremeni mobilijar, koji su namijenjeni za igru i zabavu djece. S tim u vezi, kako bi smo djeci i mladima općine Vogošća uljepšali njihovo odrastanje, potrebno je da nadležna služba iznađe adekvatnu lokaciju za izgradnju centralnog zabavnog parka za djecu i mlade.

- 8/5.** Pokrećem inicijativu prema JP Ceste Federacije BiH za izgradnju izlivne trake na magistralnom putu M 18, skretanje u naselje Poturovići.

Obrazloženje:

Naime, na navedenoj raskrsnici često dolazi do saobraćajnih nezgoda, iz razloga nepostojanja izlivne trake koju mogu koristiti vozila koja skreću u naselju Poturovići prilikom dolaska iz smjera naselja Semizovac. Izgradnjom izlivne trake na navedenom lokalitetu, poboljšala bi se sigurnost odvijanja saobraćaja, kao i sigurnost po učesnike u saobraćaju. Do saobraćajnih nezgoda na navedenom lokalitetu najčešće dolazi zbog zaustavljanja vozila koja dolaze iz smjera naselja Semizovac, a vozači imaju namjeru da skrenu u naselju Poturovići ili prilikom same radnje skretanja za navedeno naselje. Vozači koji se kreću iza navedenih vozila, naročito kada se nalaze u koloni, ne mogu na vrijeme da uoče namjeru vozača koji skreću u naselje Poturovići zbog čega dolazi do saobraćajnih nezgoda. Obzirom da je navedena saobraćajnica veoma prometna i povezuje Sarajevo sa Olovom, Tuzlom i Ilijašem, izgradnjom izlivne trake u mnogom bi se olakšalo učesnicima u saobraćaju i poboljšala sigurnost saobraćaja na navedenoj saobraćajnici.

Vijećnica **Šabić Dalia (u ime Kluba vijećnika DF)** pokrenula je slijedeće inicijative:

- 8/6.** Pokrećem inicijativu za hitnu sanaciju vodovodne cijevi u naselju Hotonj, u ulici Ramiza Alića, u neposrednoj blizini spomenika, gdje već više od 14 dana voda nekontrolisano teče niz ulicu uslijed puknuća vodovodne instalacije.

Obrazloženje:

Radnici KJKP "Vodovod i kanalizacija" Sarajevo su izlazili na teren i pokušali otkloniti kvar, ali bez uspjeha, te su lokaciju napustili kasno navečer, ostavivši problem neadekvatno riješenim. Neprekidno curenje vode predstavlja kontinuirani gubitak pitke vode, šteti infrastrukturi, uzrokuje dodatna oštećenja na kolovozu i trotoarima, te izaziva opravdano nezadovoljstvo stanovnika. S obzirom na visoke temperature tokom ljeta, povećan je i rizik od dodatnog pucanja cijevi i propadanja podloge zbog zasićenosti vodom. Tražim da se hitno izvrši ponovno ispitivanje lokacije i konačna, trajna sanacija cijevi. Održavanje i efikasno rješavanje ovakvih kvarova je ključno za očuvanje komunalne infrastrukture i povjerenja građana u javne službe.

- 8/7.** Pokrećem inicijativu da se na ulazu u ulicu Stara cesta – naselje Gornji Hotonj (iz pravca Vogošće), označi pješački prelaz u cilju povećanja sigurnosti pješaka, naročito djece i starijih građana.

Obrazloženje:

Na ovom dijelu puta trenutno ne postoji označen pješački prelaz, iako se radi o ulazu u naseljenu ulicu koju svakodnevno koriste pješaci. Stanovnici ovog dijela Hotonja već duže vrijeme izražavaju zabrinutost zbog nepostojanja sigurne tačke za prelazak ceste, naročito u jutarnjim satima kada se stvaraju gužve. Problem dodatno pogoršava činjenica da veliki broj vozača koristi ovu ulicu kao alternativni pravac za izbjegavanje saobraćajnih zastoja na glavnoj saobraćajnici, pa vozila često velikom brzinom ulaze u naselje, čime ugrožavaju sigurnost pješaka. Predlažem da se izvrši uviđaj na terenu, te pokrene procedura obilježavanja horizontalne saobraćajne signalizacije (pješački prelaz) i postavljanja dodatne vertikalne signalizacije. Na ovaj način bi se značajno povećala sigurnost svih učesnika u saobraćaju i odgovorilo na opravdane zahtjeve stanovnika Gornjeg Hotonja.

Vijećnik **Gluhović Alija (u ime Kluba vijećnika Naprijed BiH)** pokrenuo je slijedeću inicijativu:

- 8/8.** Pokrećem inicijativu da nadležna općinska služba hitno za narednu sjednicu Općinskog vijeća pripremi prijedlog Odluke o finansiranju/ sufinansiranju fizičkih lica iz Budžeta Općine Vogošća ili da se pripremi Prijedlog Odluke o izmjeni Odluke o finansiranju/sufinansiranju nevladinih

organizacija iz Budžeta Općine Vogošća”, usvojene 29.04.2025. godine na 6. redovnoj sjednici Općinskog vijeća Vogošća.

Obrazloženje:

U vremenu iza svjedoci smo određene diskriminacije vezane za dodjelu budžetskih sredstava tako što su se ona, po prethodnoj Odluci vezanoj za LOAD metodologiju, dodjeljivala samo Nevladinim organizacijama, dok pojedinci kao fizička lica, bez obzira što su imala projekte od značaja za našu lokalnu zajednicu, definisane članom 2. predložene Odluke, nisu mogla aplicirati za podršku. Time je određeni broj kreativnih pojedinaca uskraćen za našu podršku. Na 6. sjednici Općinskog vijeća, Sekretar Općine, nastojeći da nas odvрати od ulaganja amandmana na “Prijedlog Odluke o finansiranju/sufinansiranju nevladinih organizacija iz Budžeta Općine Vogošća” javno je obećao da će nadležne službe Općine Vogošća predložiti sličnu Odluku u kojoj bi se, po ovim pitanjima, tretirala fizička lica, odnosno pojedinci. Međutim, Javnog poziva niti prijedloga obećane Odluke koja bi se odnosila na dodjelu budžetskih sredstava fizičkim licima neme, te stoga podnosimo ovu inicijativu. Ukoliko bi se opredijelili da se umjesto nove Odluke kojom bi se tretirala dodjela budžetskih sredstava i fizičkim licima, predloži Izmjena Odluke o finansiranju/sufinansiranju nevalidinih organizacija iz Budžeta Općine Vogošća, koju smo usvojili na našoj 6. sjednici, u sklopu tog prijedloga trebalo bi učiniti slijedeće promjene: U nazivu Odluke iza teksta “Nevladinih organizacija” ubaciti tekst “i fizičkih lica” tako da bi puni naziv te Odluke bio: “Odluka o finansiranju/sufinansiranju nevladinih organizacija i fizičkih lica iz Budžeta Općine Vogošća”.

- U trećem redu naziva Odluke iza teksta “Nevladinih organizacija” dodati tekst “i fizičkih lica”.
- U prvom redu člana 2. Odluke iza teksta “NVO” dodati tekst “i fizičkih lica”.
- U stavu (1) člana 3. Odluke iza teksta “NVO” dodati tekst “i fizičkih lica”.
- U stavu (m) člana 4. Odluke iza teksta “NVO” dodati tekst “i fizičkih lica”.
- U prvom redu stavu (3) člana 4. Odluke iza teksta “NVO” dodati tekst “i fizičkih lica”, i u drugom redu stava (3) člana 4. Odluke iza teksta “NVO” dodati tekst “i fizičkih lica”.
- Na kraju drugog reda člana 6. Odluke iza teksta “organizacijama” ubaciti tekst “i fizičkih lica”.
- U obrazloženju u trećem redu dijela “Razlozi za donošenje” iza teksta “društva” ubaciti tekst “i fizičkih lica”, a u petom redu istog dijela iza teksta “organizacija” ubaciti tekst “i fizičkih lica”, te u trećem redu odozdo, istog dijela, iza teksta “društva” ubaciti tekst “i fizičkih lica”.

Prilog: Korigovani “Prijedlog Odluke o finansiranju/ sufinansiranju nevladinih organizacija iz Budžeta Općine Vogošća”(crveno označen tekst kojeg treba ubaciti).

Vijećnik **Piknjač Admir (u ime Kluba vijećnika NiP)** pokrenuo je slijedeće inicijative:

- 8/9.** Pokrećem inicijativu za dodjelu kanti za smeće u dijelovima Vogošće koji su izostavljeni u dosadašnjoj podjeli. Tražim od nadležne općinske službe da ovu inicijativu realizuje, a Općinsko vijeće usvoji.

Obrazloženje:

Općina Vogošća se suočava sa problemom podjele kanti za smeće i odvoza smeća pojedinih domaćinstvima kojima se u uredno naplaćuje odvoz smeća, a da nemaju ni dostavljenih kanti u koju bi građani odlagali smeće. Ovakva situacija stvara nepravedan, nepovoljan i krajnje neodgovoran, diskriminirajući položaj za građane koji nemaju adekvatan pristup i uvjete za odlaganje smeća. Konkretno na adresi Igmanska broj 1., MZ Hotonj nisu dostavljene kante za odlaganje smeća, niti je vršen odvoz smeća, a računi su dolazili i računi nisu plaćeni iz navedenih razloga. Nakon više od dvije godine došao je nalog nadležnog suda da se obaveza po pristiglim računima plati. Lično sam platio 1300,00 KM troškova za odvoz smeća, a kante nisu dostavljene, niti je vršen odvoz smeća. U KJKP “Rad” su me obavijestili da je podjela kanti nadležnost općine Vogošća, a da svoja prava i naknadu ostvarim putem nadležnog suda.

- 8/10.** Pokrećem inicijativu koja se odnosi se za pokretanje akcije među privrednicima općine Vogošća za nabavku vozila i druge medicinske opreme za Dom zdravlja Vogošća.

Obrazloženje:

Polazeći od potrebe za unaprijeđenjem zdravstvene zaštite na području općine Vogošća pokrećem inicijativu kojom predlažem da Općinsko vijeće Vogošća zatraži od Načelnika Općine da pokrene inicijativu prema privrednim subjektima koji djeluju na području naše općine u cilju zajedničkog ili pojedinačnog finansiranja nabavke vozila i druge opreme za potrebe Dom zdravlja Vogošća.

Vijećnica **Briga Sanela (u ime Kluba vijećnika SDA)** pokrenula je slijedeću inicijativu:

8/11. Da se pokrenu sve potrebne radnje s ciljem rješavanja imovinsko-pravnih odnosa na dijelu ulice Blagovac III (od broja 162. do broja 180.), te da se izvrši asfaltiranje dijela te ulice koja se nalazi u vlasništvu Općine Vogošća.

Obrazloženje:

Ulica Blagovac III u svom gornjem dijelu (od broja 162. do broja 180.) spaja se na saobraćajnicu koja povezuje naelje Rosulje i Blagovac. Međutim, dio te ulice koja se spaja na glavnu saobraćajnicu je u privatnom vlasništvu, dok je nastavak ulice, konkretno gornji dio, u vlasništvu Općine Vogošća. Zbog neriješenih imovinsko-pravnih odnosa na dijelu koji je u privatnom vlasništvu, do sada nije bilo moguće izvršiti kompletno asfaltiranje. Predlažem da se:

1. Pristupi rješavanju imovinsko-pravnih odnosa na dijelu puta koji je u privatnom vlasništvu, kroz pregovore sa vlasnicima radi eventualnog prijenosa vlasništva na Općinu ili drugim zakonom predviđenih postupaka.
 2. Ukoliko prijenos vlasništva nije moguć u skorije vrijeme, da se pristupi asfaltiranju dijela puta koji je u vlasništvu Općine, a svakako se nalazi u programu prioriteta Općine Vogošća, kako bi se stanoivnicima ovog dijela Blagovca omogućili osnovni uslovi za pristup i kretanje.
- Ova inicijativa je u interesu lokalne zajednice, unaprijeđenja infrastrukture i poboljšanja kvaliteta života građana.

Vijećnica **Karović Amra (u ime Kluba vijećnika SDP)** pokrenula je slijedeće inicijative:

8/12. Pokrećem inicijativu da se izvrši sanacija i zamjena uništenih klupa u ulici Tome Mendeša od broja 24. do 26.

Obrazloženje:

U ulici Tome Mendeša na broj 24. i 26. nalaze se klupe koje su devastirane i koje nisu za korištenje. Stanari pomenute ulice prijavili su problem već ranije bez pozitivnog odgovora. Klupe su polomljene neupotrebljive što daje ružnu sliku ulice čak i povređivanje u slučaju korištenja od strane mlađe populacije. Parkovi, zelene površine kojih je sve manje, klupe su mjesta i male oaze mira u svakom gradu. Molim nadležne službe da u što kraćem vremenu izvrše sanaciju ili zamjenu klupa sa novim klupama. Fotografije u prilogu.

8/13. Pokrećem inicijativu da se postavi okruglo saobraćajno ogledalo na mjestu križanja ulice Skendera Kulenovića i 24. juna.

Obrazloženje:

Postavljanje saobraćajnog ogledala olakšava kretanje vozila i smanjuje mogućnost saobraćajnih udesa. Omogućava uočavanje učesnika u saobraćaju na nepreglednim mjestima na putu. Obzirom na frekvencu vozila na pomenutoj lokaciji, ostvarenje ove inicijative bi bilo značajno korisno. Fotografije u prilogu.

Vijećnik **Cvrk Čamil (u ime Kluba vijećnika DF)** pokrenuo je slijedeće inicijative:

8/14. Pokrećem inicijativu za sanaciju trotoara ispred vrtića „Ljiljani“, koji se nalazi u lošem i neuređenom stanju još od završetka prethodnih radova koji su izvedeni tokom jeseni prošle godine.

Obrazloženje:

Na lokaciji ispred vrtića „Ljiljani“ uočljivo je da je dio trotoara ostao neuređen i neuslovan za kretanje, te da se nakon završenih radova nije vratio u prvobitno stanje. Ovo predstavlja problem za pješake, a naročito roditelje s malom djecom, kolica, starije osobe, te korisnike vrtića. S obzirom da se radi o prostoru ispred predškolske ustanove, neophodno je da se ovaj problem riješi u najkraćem mogućem roku, kako bi se spriječile povrede, olakšao pristup i omogućili osnovni uslovi sigurnog kretanja.

8/15. Pokrećem inicijativu za sanaciju dugogodišnjeg curenja vode na magistralnom putu u Semizovcu, 50 metara prije restorana „Kulin Dvor“.

Obrazloženje:

Na pomenutoj lokaciji već više od četiri godine konstantno dolazi do curenja vode podzemnih instalacija što izaziva oštećenja kolovoza, stvaranje leda zimi, klizavih površina tokom cijele godine i povećanog rizika od saobraćajnih nesreća. Iako se ovaj problem redovno prijavljuje od strane građana i lokalne zajednice, do danas nije poduzeta nijedna trajna mjera sanacije.

Vijećnik **Škoro Hamdija** (u ime Kluba vijećnika **Naprijed BiH**) pokrenuo je slijedeću inicijativu:

- 8/16.** Pokrećem inicijativu za saniranje curenja vode na adresama Jošanička broj 155., Jošanička broj 6., kao i ulici Spasoje Blagovčanina broj 28.

Obrazloženje:

Naime, na gore pomenutim adresama uočeno je curenje vode na putu, a obzirom da ne znamo o kojoj vrsti vode se radi (otpadne vode ili kanalizacija) i da li je ista opasna po zdravlje građana. molim nadležnu općinsku službu da hitno posveti pažnju rješavanju ovog problema.

Vijećnik **Hebib Armin** (u ime Kluba vijećnika **SDP**) pokrenuo je slijedeće inicijative:

- 8/17.** Pokrećem inicijativu prema Policijskoj upravi Vogošća da se uz pomoć policijskih organa privremeno reguliše saobraćaj u ulici Spasoja Blagovčanina (pored pijace) putem usmenih opomena vozačima, bez represivnih mjera i izricanja kazni.

Obrazloženje:

U proteklom periodu primijećena je pojačana frekvencija saobraćaja u ulici Spasoja Blagovčanina, posebno u jutarnjim i poslijepodnevnim satima, u vremenu prije i nakon završetka radnog vremena. Posebnu zabrinutost izaziva sve izraženija saobraćajna gužva u zoni oko pijace, koja u tim periodima poprima haotične razmjere. Jedan od glavnih uzroka ovakve situacije jeste nepropisno parkiranje i zaustavljanje vozila, naročito u neposrednoj blizini raskrsnice kod pijace. Ovakvo ponašanje učesnika u saobraćaju ne samo da otežava njegovu protočnost, već predstavlja i ozbiljan bezbjednosni rizik. Manje saobraćajne nezgode već su se dogodile, a stiče se utisak da je samo pitanje vremena kada bi moglo doći do težeg incidenta, što dodatno narušava i sigurnost i ugled samog naselja. Iako su policijski službenici povremeno prisutni i regulišu saobraćaj na ovom lokalitetu, ostaje nejasno zašto u vremenu najvećih gužvi nije prisutan veći broj saobraćajnih patrola, naročito s obzirom na to da se radi o području s visokom koncentracijom vozila. Smatramo da bi preventivno djelovanje policijskih službenika, kroz povećanu prisutnost i prisniju kontrolu, moglo značajno doprinijeti smirivanju saobraćajne situacije. Takav pristup bi omogućio da se pažnja vozača koji se ne ponašaju društveno odgovorno zaustavljajući i parkirajući vozila kako bi obavili kupovinu na pijaci ili u okolnim trgovinama usmjeri na važnost poštivanja saobraćajnih propisa i zaštite svih učesnika, posebno pješaka. Vjerujemo da bi dosljedne i dobro usmjerene preventivne mjere mogle doprinijeti podizanju svijesti kod vozača i dugoročnom poboljšanju stanja, bez potrebe za represivnim mjerama ili izricanjem kazni. S tim u vezi upućujem navedenu inicijativu prema Policijskoj upravi Vogošća.

- 8/18.** Pokrećem inicijativu za rekonstrukciju i obnovu "Cvijet Srebrenice" u ulici Feriza Merzuka.

Obrazloženje:

U ime građana naše općine posebno stanovnika ulice Feriza Merzuka, upućujem inicijativu da se izvrši rekonstrukcija i obnova simbola "Cvijeta Srebrenice", koji se nalazi u pomenutoj ulici, a koji je u prethodnim godinama bio važan znak sjećanja i podsjećanja na genocid počinjen u Srebrenici. Obnova ovog simbola ne bi bila samo pitanje uređenja javne površine, već čin dubokog poštovanja prema žrtvama najvećeg zločina počinjenog na tlu Evrope nakon Drugog svjetskog rata. Naime, Vogošća je kroz svoju noviju historiju pokazala izuzetnu humanost i solidarnost prema protjeranim i preživjelim stanovnicima Srebrenice i Podrinja, koji su nakon agresije na Bosnu i Hercegovinu upravo ovdje našli utočište i novu nadu. Prema dostupnim podacima, Vogošća je neposredno nakon agresije zbrinula nekoliko hiljada raseljenih lica sa područja istočne Bosne, a ta briga ostaje duboko ukorijenjena u kolektivnom pamćenju naše zajednice. Danas, kada u toj ulici imamo i novu pješačku stazu, važno je da ne zaboravimo da se u neposrednoj blizini nalazi i simbolički podsjetnik – Cvijet Srebrenice, čija je obnova potrebna kako bi se i nove generacije podsjećale na značaj kulture sjećanja, ali i na vrijednosti empatije, solidarnosti i zajedničkog pamćenja koje nas oblikuje kao društvo. Podsjećam da se na području naše općine nalazi i Trg žrtava genocida u Srebrenici, koji iz ptičije perspektive nosi oblik upravo Cvijeta Srebrenice – snažnog simbola otpora, dostojanstva i sjećanja. Njegova forma i poruka nisu samo urbanistički element, već i jasan izraz stava naše lokalne zajednice da žrtve ne smiju biti zaboravljene, te da je naša trajna obaveza da negujemo kulturu sjećanja. Ova inicijativa ne traži mnogo u smislu materijalnog ulaganja, ali nosi veliku simboličku vrijednost, kako za porodice žrtava genocida, tako i za našu lokalnu zajednicu koja ne zaboravlja.

Vijećnik **Mehić Almedin** (u ime Kluba vijećnika **SDA**) pokrenuo je slijedeću inicijativu:

- 8/19.** Pokrećem inicijativu za kreiranje online platforme/registra lokalnih firmi i zanatlija, koja bi služila kao interaktivna stranica za promociju firmi, te bržu i lakšu komunikaciju sa lokalnim zajednicama. Znamo važnost jake privrede za svaku lokalnu zajednicu, te smo dužni da našim privrednicima olakšamo pristup komunikaciji. Velika finansijska sredstva se dodjeljuju kroz programe i projekte domaćih i međunarodnih aplikacija i tendera, te bi aplikantima bila omogućena lakša razmjena informacija i pomoć u pripremi projekata.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

- 8/20.** Pokrećem inicijativu za postavljanje table Blagovac. Predlažem da nadležna općinska služba pokrene proceduru postavljanja informativne table sa natpisom „Blagovac“ na izlazu iz kružnog toka koji vodi prema naselju Blagovac.

Obrazloženje:

Građani i posjetioci često imaju poteškoće u orijentaciji prilikom kretanja kroz navedeni dio, posebno oni koji nisu iz tog naselja. Postavljanjem jasno označene table olakšalo bi se snalaženje u saobraćaju, poboljšala informisanost te unaprijedila vidljivost i pristupačnost naselja Blagovac. Ova inicijativa doprinosi boljoj organizaciji saobraćaja, povećava sigurnost i izlazi u susret potrebama lokalne zajednice. Molim da se inicijativa razmotri i da me nadležna služba informiše o mogućnostima njene realizacije.

- 8/21.** Pokrećem inicijativu za osiguranje pristupa osobama s invaliditetom i majkama s dječijim kolicima Poreznoj službi u zgradi Općine Vogošća.

Obrazloženje:

Trenutno stanje predstavlja ozbiljno kršenje osnovnih ljudskih prava na jednak pristup javnim institucijama, te nije u skladu sa Zakonom o zabrani diskriminacije u BiH, niti sa međunarodnim standardima pristupačnosti. Prijedlog konkretnih mjera:

1. Izgradnja ili ugradnja rampe za invalidska kolica na ulazu u prostor Porezne službe.
 2. Postavljanje adekvatnih oznaka i signalizacije za smjer kretanja osoba s poteškoćama.
- Napominjem da pristupačnost nije luksuz nego osnovno pravo i da se realizacijom ove inicijative pokazuje odgovornost Općinskog vijeća prema svim građanima, posebno onima koji su najčešće marginalizirani. Molim nadležne službe da izvrše procjenu potrebnih radova i troškova, te dostave prijedlog rješenja u najkraćem mogućem roku.

Vijećnik **Glijiva Eno (u ime Kluba vijećnika DF)** pokrenuo je slijedeću inicijativu:

- 8/22.** Pokrećem inicijativu da se stanovnicima ulice Stara cesta u Semizovcu, na dionici između brojeva 20 i 24, omogući siguran i legalan pristup vlastitim kućama kroz formiranje prolaza u zaštitnoj ogradi postavljenoj uz magistralni put, po uzoru na već postojeće prolaze dalje niz istu ulicu.

Obrazloženje:

Trenutno, zbog nepostojanja prolaza kroz ogradu, stanovnici su primorani da preskaču ogradu – što predstavlja rizik za povrede, naročito za djecu, starije osobe i osobe s ograničenom pokretljivošću. Alternativni put vodi uz sami zid, bez trotoara, čime su građani izloženi opasnosti, jer se kreću neposredno uz prometnu magistralnu cestu. U nastavku iste ulice već postoje slični prolazi u ogradi, koji omogućavaju siguran pristup domaćinstvima, te se postavlja pitanje jednakog tretmana i osnovne pristupačnosti za sve stanovnike ove dionice. Predlažem da se izvrši uviđaj na terenu, a zatim u saradnji sa JP Ceste Federacije BiH, razmotri mogućnost i realizacija otvora u zaštitnoj ogradi – u cilju osiguranja bezbjednog, funkcionalnog i humanog pristupa domaćinstvima u ovoj zoni.

Vijećnik **Bogilović Enis (u ime Kluba vijećnika NiP)** pokrenuo je slijedeće inicijative:

- 8/23.** Pokrećem inicijativu da se vijećnički paušal izjednači sa gradskim općinama ili približno bude isti, tj., poveća vijećnicima Općinskog vijeća Vogošća.

- 8/24.** Pokrećem inicijativu da se područnoj ambulanti Kobilja Glava poprave (saniraju) klima uređaju ili zamjene.

Obrazloženje:

Od četiri ili pet klima uređaja koje se nalaze u čekaonici područne ambulante Kobilja Glava ni jedna nije ispravna. Stanje u čekaonici u ovim ljetnim danima je nepodnošljivo za pacijente koji čekaju na pregled kod doktora.

Vijećnik **Pašagić Almir** (u ime Kluba vijećnika SDP) pokrenuo je slijedeće inicijative:

8/25. Pokrećem inicijativu za pravljenje podzemne garaže na mjestu sadašnjeg parking prostora preko puta Trga žrtava genocida Srebrenica.

Obrazloženje:

Na navidenoj lokaciji nalazi se parking na kojem se bi se napravila podzemna garaža, a na površini dječje igralište. Razlog izgradnje podzemne garaže sa velikim brojem parking mjesta jeste: blizina fudbalskog stadiona, sportske dvorane, osnovne škole, vrtića, centralne džamije i stalnog apela stanara iz ulice Omladinska stalno na uzurpaciju parking mjesta.

8/26. Pokrećem inicijativu da Općina Vogošća obezbijedi bar jedan autobus za besplatan prevoz 11.07.2025. godine za odlazak na dženazu u Potočare.

Obrazloženje:

Podnosim inicijativu da se 11.07.2025. godine obezbijedi jedan autobus za besplatan prevoz svih građana na relaciji Vogošća - Srebrenica (Potočari) -Vogošća koji žele taj dan da prisustvuju dženazi u Potočarima. Obzirom da se ove godine navršava 30 godina od genocida u Srebrenici, učinjenog nad bošnjačkim stanovništvom, postoji velika zainteresovanost građana Vogošće da prisustvuju dženazi u Potočarima. U skladu sa navedenim predlažem da se ispred Općine Vogošća organizuje autobus koji bi 11.07.2025. godine mogao prevesti sve one građane koji budu željeli u Srebrenici (Potočarima) prisustvovati odavanju počasti svim stradalim u genocidu učinjenom prije tačno 30 godina i ponovo vrati u Vogošću.

Vijećnik **Kulo Muamer** (u ime Kluba vijećnika SDA) pokrenuo je slijedeću inicijativu:

8/27. Pokrećem inicijativu prema nadležnom ministarstvu Kantona Sarajevo i nadležnom javnom preduzeću da izvrše uređenje autobusnog stajališta Poturovići (MZ Semizovac)

Obrazloženje:

Trenutno stanje autobusnog stajališta Poturovići (MZ Semizovac) je alarmantno jer ne postoji trotoar za putnike koji ulaze i izlaze iz javnog prijevoza čime je ugrožena direktno sigurnost putnika, niti postoji odgovarajuća nastrešnica koja štiti putnike od kiše, sunca i drugih vremenskih prilika. U prilogu dostavljam slike trenutnog stanja.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir